

左文襄公全集

左文襄公奏稿卷十三

起同治四年乙丑四月訖五月

目錄

分路進剿疊勝見籌辦理情形摺

老湘營會攻苦竹賊壘情形片

搜獲洋人濟逆槍礮軍火各員請獎片

請將短徵鹽課之福建鹽法道革職片

進徧漳州大捷見籌辦理情形摺

護送琉球貢使委員沿途濫索請革職摺

攻克漳州府城南靖縣城摺

攻拔苦竹賊壘情形片

閩省腹地未清未能先顧鄰省片

追剿竄賊大勝連克平和漳浦雲霄各城摺

收復詔安首逆乞降并截剿逸賊大勝首逆就殲摺

攻克南靖縣城詳細情形片

分路進剿疊勝見籌辦情形摺

同治四年四月十一日
會福建巡撫徐宗幹銜

奏爲官軍分路進剿疊獲大勝見籌辦情形恭摺馳奏仰祈

聖鑒事竊劉典等軍由龍巖進剿奎洋獲勝後汪逆海洋仍率死
黨屯踞龍巖南靖永定交界之金豐苦竹梅林山城場校上下奎
洋一帶三月二十日康國器馳抵龍巖撫溪偵知苦竹之賊分踞
茅畚添築數壘二十一日親督知府康熊飛副將吳光亮參將詹
惠林本遊擊羅洪彪熊應烈所部分路進剿飭都司關鎮邦堅守
龍潭防梅林之賊抄襲康熊飛林本羅洪彪熊應烈等甫至東安
遇賊數百擁至麾隊急擊斃悍賊四十餘名生擒三十二名茅畚
踞逆傾巢來援康熊飛等更番疊戰賊仍抵死不退吳光亮詹惠

率隊從小路抄出攻破山腰賊壘賊始駭卻康熊飛等乘勢急進
轟斃悍賊數十名賊悉棄壘狂竄立將茅畚賊壘三座踏毀適官
軍進逼漳州侍逆屢爲官軍所敗呼援甚急將上下奎洋各處山
徑悉行掘塞以阻官軍僅畱由南靖赴漳郡一路以通往來二十
四日劉典率副將張福齋等繞赴永溪察看路徑詢據逃出賊供
知汪逆十七日赴漳郡二十三日仍回場校遂函商道員張恆祥
一軍由和溪康國器一軍由撫溪於二十七日分路進剿飭張福
齋率參將彭俊光宋定元軍功蕭雅泗等四營與張恆祥所部從
左路進攻下奎洋賊壘該逆傾巢出拒張恆祥張福齋親督各營
奮威衝殺攻破賊卡兩處見嶺巔尙有二壘守賊約四五千入張

恆祥所部參將李大有督隊仰攻傷亡勇丁數十名總兵何映文
文禹商與張福齋等督飭各勇肉薄壘下前者被傷後者繼進該
逆悉力拒守右手山岡之賊復搖旂擂鼓應之道員李耀南同知
楊鼎勛分飭所部副將余佑民遊擊楊懷瑾都司劉春藻等蛇行
而進該逆憑高擊下礮石如雨官軍冒險奪踞山巔張恆祥及參
將彭俊光亦率隊猱騰而上徑拊其背賊勢不支殺斃及墜崖死
者無算宋定元等乘勢攻入逆賊紛紛棄壘狂竄張福齋張恆祥
分率所部追殺立將下奎洋賊壘五座賊館五十餘處賊卡十餘
處一律踏毀殺賊二千餘名拔出難民數千當官軍之進攻下奎
洋也中奎洋踞逆率眾來援劉典飭參將陳集賢擬保副將王前

程擬保副將銜參將程應陞督隊扼剿知縣陳鴻藻所部繼之李耀南楊鼎勛由下奎洋轉戰而來與已革參將劉大謨等三路進擊將中奎洋踞逆擊敗賊館埽盪乘勝追殺斃賊數百名餘賊縮入對岸壘中官軍偪攻正急汪逆率悍黨由梅林場校突出勢極凶悍劉典親督各勇猛戰十餘合將賊擊退而上奎洋來援之賊亦經總兵楊芳桂所部擊敗始各收隊共斃賊二千餘名陣斬僞天將翟玉山陳光明及曾姓等賊目數十名生擒老賊七十餘名奪旂幟軍械無數其康國器一軍進剿苦竹行抵磔下卽與賊遇該逆不意官軍驟至縮入卡中吳光亮林本熊應烈等併力圍攻火箭火彈拋入賊壘霎時草棚著火延燒賊眾大駭官軍趁勢立

將礮下賊壘焚毀三路躡追適苦竹之賊率大股來迎吳光亮等奮勇衝殺斬賊數百名生擒四十餘名賊敗走官軍追至苦竹羣賊悉退入山頂壘中吳光亮等見山腰矗立礮臺一座後有小壘護之卽飭各勇開礮轟擊守賊驚潰官軍乘勢搶入急攻山後小壘又破之餘賊殲斃殆盡山頂各逆亦鼠伏不出其康熙飛等行至大坪遙見場校梅林援賊翻山竄至卽飭詹惠羅洪彪兩營分路埋伏自率輕騎前往挑之逆賊愈戰愈多官軍佯退誘入伏中兩路突起奮擊斃賊三百餘名生擒二十餘名賊眾大潰正躡蹤追剿而後股援賊又蜂擁而至康熙飛當率所部陷陣往來盪決立斬騎馬賊目二十餘名斃賊四百餘名生擒三十餘名收隊而

還計共斃賊千餘名生擒百餘名奪騾馬五十餘匹此劉典張恆祥康國器等軍由龍巖進勦苦竹奎洋破壘獲勝之實在情形也其署衢州總鎮兵劉清亮馳抵漳州北溪卽飭所部副將李運榮參將陳武職兩營過河築壘三月十三十六等日賊撲東路官軍營壘并出隊至河邊意圖牽制經劉清亮督飭各營擊退十八日王德榜分中營兩哨過河築壘該逆一股衝至河邊擊傷搭造浮橋勇丁三十餘名王德榜令知縣鍾世祉帶劈山礮排列下面淺灘轟擊并飭洋槍隊過河接戰轟斃騎馬賊目二名悍賊二百餘名賊始退卻一股徑撲李運榮陳武職營壘劉清亮督各營分路迎擊血戰五時賊殊死鬪適中路官軍將督戰騎馬賊目一名轟

斃賊少卻李運榮等督隊急進步賊數十人偪陷泥淖中盡殲之
羣賊紛紛潰竄陳武職李世祥孫永忠等左右抄擊合軍追至后
房破賊卡一處斃賊數百名二十四日王德榜復飭總兵李運勝
過河分紮兩營并飭各營列隊河邊助之該逆分三路來犯官軍
奮力迎擊鏖戰數時賊卻而復前者十餘次王德榜親督洋槍隊
劈山礮向紅號衣悍賊轟擊步偪步進羣子如雨賊勢不支各營
乘勝壓擊追至濠邊斃賊無數計是役傷斃賊約共千餘人官軍
亦受傷五十餘人擬保總兵花翎遊擊鍾元興匹馬陷陣被賊洋
槍擊傷回營殞命此劉清亮王德榜兩軍進扼漳州東北擊退撲
營悍賊獲勝實在情形也竊李逆世賢經官軍屢次痛剿固匿不

出惟於漳城外東關迤北一帶添築十餘壘與樓內寨踞賊合力以扼官軍汪逆海洋屢敗之餘局勢亦愈斂蹙下海一著又不得逞必不併聚一隅延頸待戮是其伺隙狂竄固在意中察看近日賊蹤漸向漳州東北及正北一帶官軍之分扼和溪水潮及華峰司苦竹者兵力尙單漳州東北一帶山徑紛歧僅王德榜劉清亮兩軍七千人難敷分布

臣

宗棠以西路龍巖永定一帶屢獲勝仗

汪逆勢難由此北竄駐延平之六營尙可調赴泉漳之交以厚兵力見飭新授福甯鎮總兵劉明燈等五營取道省城由興泉以赴安溪邊界相機進剿

臣

宗棠拜摺後卽帶親兵續進擬晉省數日

後卽親赴前途就近督辦其陸路提督郭松林記名提督楊鼎勳

所部本擬進攻漳浦因賊勢趨重漳州郭松林一軍抵廈門後分
紮海澄鎮門與高連陞各營甫相聯絡未便遽行他調楊鼎勳一
軍亦至廈門而漳浦之賊又多縮轉漳郡蘇軍暫由漳南攻剿可
斷漳州漳浦踞賊往來於局勢深有裨益所有此次西路各將士
因軍米購運艱阻忍飢血戰迅赴戎機勞烈尤著其最爲出力之
總兵銜副將張福齋可否仰懇

天恩賞給勇號候選道張恆祥可否

賞加鹽運使銜畱於福建補用畱浙補用知府康熊飛可否

賞加道銜以示鼓勵餘由

臣

等存記彙保其力戰陣亡之擬保總

兵花翎遊擊鍾元興花翎都司陳育訢擬保都司周有元藍翎守

備周振源守備陳仕秀擬保守備銜千總藍翎把總劉吉祥千總彭連陞王維藩擬保千總藍翎外委張桂松擬保把總鍾寶齡毛義方擬保藍翎把總徐得勝擬保外委馬日友張元茂可否請

旨敕部俱照擬保官階從優議卹以慰忠魂理合恭摺馳奏伏乞

皇上聖鑒訓示施行再此摺係由 臣 宗棠主稿合併聲明謹 奏

同治四年四月二十六日內閣奉

上諭左宗棠等奏官軍分路進剿疊獲大勝一摺福建汪逆海洋經官軍由龍巖剿敗後仍率黨分踞龍巖南靖永定交界之金豐苦竹梅林山城場校上下奎洋一帶并分踞茅畚添築數壘三月二十至二十七等日經道員康國器等軍各率所部分路進剿擊

斃悍賊四十餘名官軍更番疊戰賊悉棄壘奔竄立將茅畚賊壘
三座踏毀其上下奎洋各處之賊經劉典督率各軍分道進攻疊
破賊卡該逆踞嶺巔爲壘官軍冒險搶上山巔道員張恆祥等率
隊猱騰而上殺斃賊匪無數立將下奎洋賊壘五座賊館五十餘
處賊卡十餘處一律踏毀并將中奎洋賊館乘勝埽盪其上奎洋
及梅林場校等處之賊均經官軍奮力進剿疊破賊卡殲斃殆盡
先後共計斃賊五千餘名生擒長髮老賊七十餘名陣斬僞天將
翟玉山等數十名拔出難民數千名其漳州援賊亦經總兵劉清
亮等於三月十三等日督飭各軍分途迎剿斃賊千餘人賊匪紛
紛敗潰剿辦甚屬得力著卽督飭各路官軍乘勝奮剿迅速埽盪

以靖邊圉其尤爲出力之副將張福齋著賞給揚勇巴圖魯名號
候選道張恆祥著以道員畱於福建補用并賞加鹽運使銜知府
康熊飛著賞加道銜以示鼓勵其力戰陣亡之擬保總兵遊擊鍾
元興都司陳育訢擬保都司周有元守備周振源陳仕秀擬保守
備銜千總藍翎把總劉吉祥千總彭連陞王維藩擬保千總藍翎
外委張桂松擬保把總鍾寶齡毛義方擬保藍翎把總徐得勝擬
保外委馬日友張元茂均著各照擬保官階從優議卹餘著照所
議辦理該部知道欽此

軍機大臣字寄同治四年四月二十六日奉

上諭左宗棠奏官軍分路進剿疊獲大勝見籌辦情形一摺本日已明降諭旨將出力之副將張福齋等照請獎勵陣亡之遊擊鍾元興等照擬保官階優卹矣逆首汪海洋盤踞龍巖南靖永定交界之金豐等處經官軍分路進攻疊破茅畚磔下并下奎洋賊壘苦竹賊壘亦經攻破餘賊逃踞山頂其漳州東北兩面撲營之賊復爲官兵擊退賊勢漸形窮蹙左宗棠以漳城東北一帶兵力尙單添調總兵劉明燈等五營由興泉赴安溪邊界進剿該督亦帶親兵由省城取道趨赴前途督辦著卽親督各營將士將漳郡踞賊實力埽盪毋稍鬆勁郭松林楊鼎勳等軍分紮海澄鎮門及

廈門等處與高連陞等各營聯絡聲勢當可斷賊入海之路惟賊情詭譎異常左宗棠須嚴檄郭松林等加意巡防不可稍涉大意漳浦之賊既多轉入漳郡正可令郭松林等分兵乘虛襲取漳浦以清漳郡南路此股逆匪俱係積年悍賊乘隙分竄是其慣技左宗棠務當分兵布置四面圍剿將漳郡之賊就地殲盡毋令逸出鄰境致垂盡餘匪又成燎原之勢是爲至要漳州西路官軍雖屢獲勝仗而地廣兵單深虞旁竄左宗棠前擬檄調江西之軍就近援剿未知曾否到防見在金豐及上中奎洋賊巢尙未盡掃苦竹山頂尙爲賊踞卽著左宗棠檄飭各軍乘勝攻拔并著瑞麟郭嵩燾飭令李福泰方耀統帶所部會合閩省西路各軍先將雲霄平